



Broj:KSI-09-263/26

Datum: 23.07.2026. godine

Na osnovu člana 25. tačka g) Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“ broj: 04/21 i 18/26) i člana 25. stav (2) Poslovnika o radu Komisije za odlučivanje o sukobu interesa, postupajući po anonimnoj prijavi od 10.07.2026. godine, protiv odgovornog lica u JP „Komunalno Brčko“ d.o.o. Brčko distrikt BiH radi utvrđivanja sukoba interesa, Komisija za odlučivanje o sukobu interesa, na 155. sjednici održanoj dana 23.07.2026. godine, donosi

### ODLUKU

Postupak za odlučivanje o sukobu interesa protiv odgovornog lica u JP „Komunalno Brčko“ d.o.o. Brčko distrikt BiH, neće se pokrenuti, obzirom da iz dokumentacije i radnji ne proizilazi da je u postupanju došlo do povrede odredaba Zakona o sprečavanju sukoba interesa u institucijama Brčko distrikta Bosne i Hercegovine, odnosno postojanja sukoba interesa.

### Образложење

Dana 10.07.2026. godine Komisiji za odlučivanje o sukobu interesa kao nadležnom organu od strane Kancelarije za prevenciju korupcije i koordinaciju aktivnosti na suzbijanju korupcije u Brčko distriktu BiH dostavljen je na postupanje predmet broj: 48-19-161/26 (3/26) od 08.07.2026. godine, kao nadležnom organu.

U dostavljenom spisu, navedeno je da je Kancelarija za prevenciju korupcije i koordinaciju aktivnosti na suzbijanju korupcije u Brčko distriktu BiH zaprimila prijavu vezano za kršenje Zakona o sprečavanju sukoba interesa Brčko distrikta BiH u kojoj se navodi da je u JP „Komunalno Brčko“ d.o.o. Brčko distrikt BiH centralizovana komunikacija i da je u rukama lica koje može biti predmet žalbe i predstavlja školski primjer institucionalnog sukoba interesa i da se direktor preduzeća, odnosno odgovorno lice u preduzeću JP „Komunalno Brčko“ d.o.o. Brčko distrikt BiH sa ovakvom organizacijom stavlja u poziciju da njegov privatni interes (zaštita sopstvene pozicije od pritužbi) dolazi u sukob sa javnim interesom i zakonskom obavezom nepristrasnog postupanja, te da je kontrola ulaznih informacija namijenjena nadzornom organu, a da ovako postoji direktna zloupotreba javnih ovlaštenja. Obzirom da Kancelarija za prevenciju korupcije i koordinaciju aktivnosti na suzbijanju korupcije u Brčko distriktu BiH nije nadležna da odlučuje u dijelu prijave koji se odnosi na sukob interesa, predmet je dostavila Komisiji kao nadležnom organu, u skladu sa članom 52. stavom (4) Zakona o upravnom postupku Brčko distrikta BiH i Sporazumom o saradnji između Kancelarije za prevenciju korupcije i koordinaciju aktivnosti na suzbijanju korupcije u Brčko distriktu BiH i Komisije za odlučivanje o sukobu interesa Brčko distrikta BiH, broj: 02-19-216/24 od 29.10.2024. godine.

Članom 2. tačkom a) propisano je da „sukob interesa“ postoji kad nosilac javne funkcije ima privatni interes koji utiče, može uticati ili se stvara utisak da utiče na obavljanje javne funkcije.

Članom 21. Statuta JP „Komunalno Brčko“ d.o.o. Brčko distrikta BiH propisan je da su organi preduzeća: Upravni odbor preduzeća, kao organ upravljanja, direktor preduzeća i zamjenici direktora, kao poslovodni organ.

Članom 28. Statuta JP „Komunalno Brčko“ d.o.o. Brčko distrikta BiH propisano je da je Upravni odbor preduzeća nadležan da: usvaja Statut javnog preduzeća uz saglasnost osnivača; usvaja pravilnike i druge opšta akta preduzeća; donosi poslovnik o radu Upravnog odbora; usvaja godišnji poslovni plan preduzeća uz saglasnost osnivača; usvaja dugoročni plan razvoja preduzeća uz saglasnost osnivača; odlučuje o statusnim promjenama preduzeća (podjela, spajanje i pripajanje), uz saglasnost osnivača; odlučuje o povećanju i smanjenju kapitala javnog preduzeća, uz saglasnost osnivača; odlučuje o unutrašnjoj organizaciji i sistematizaciji radnih mjesta u preduzeću, uz saglasnost osnivača; odlučuje kao drugostepeni organ po žalbama izjavljenim protiv akata preduzeća; imenuje i razrješava direktora preduzeća i zamjenike direktora, odnosno vršioca dužnosti direktora preduzeća: zaključuje ugovor o radu sa zasnivanjem radnog odnosa sa direktorom preduzeća i zamjenicima direktora; daje instrukcije direktoru preduzeća radi otklanjanja nepravilnosti u radu; donosi etički kodeks na prijedlog direktora preduzeća; vrši sisitematski nadzor nad poslovanjem i zakonitošću rada preduzeća; daje saglasnost na Statut drugog pravnog lica, koje osniva preduzeće i usvaja izvještaje o radu navedenog pravnog lica; vrši izbor i odobrava ugovor zaključen sa eksternim revizorom; utvrđuje cijene roba i usluga u skladu sa zakonom i drugim propisima; usvaja završni račun koji priprema direktor i dostavlja skupštini Distrikta na odobrenja.

Članom 31. Statuta JP „Komunalno Brčko“ d.o.o. Brčko distrikta BiH propisano je da direktor preduzeća ima sljedeće nadležnosti: organizacija i vođenje poslova preduzeća; izvještavanje Upravnog odbora preduzeća na zahtjev upravnog odbora; provedba statuta; izrada i nadgledanje realizacije godišnjeg i dugoročnog plana poslovanja; izrada provedbenih propisa za postupak nabavki i provedba važećih zakona i propisa o postupku nabavke; priprema prijedloga o raspodjeli dobiti i dostavlja Upravnom odboru na usvajanje: priprema prijedlog cijena roba i usluga u skladu sa zakonom i drugim propisima; zapošljavanje i otpuštanje zaposlenika u skladu sa postupcima utvrđenim pravilnicima te važećim zakonima; zastupa i predstavlja preduzeće u unutrašnjem i vanjskotrgovinskom prometu; predlaže razvojnu i poslovnu politiku; predlaže planove rada i program razvoja i preduzima mjere za njihovo sprovođenje; staranje i odgovornost za zakonitost rada preduzeća: distribucija i implementacija etičkog kodeksa u preduzeću; priprema prijedloge akte iz nadležnosti upravnog odbora; sprovodi odluke Upravnog odbora; donosi opšte akte koji nisu u nadležnosti upravnog odbora; donosi pojedinačne akte kojima se rješava o pravima i obavezama zaposlenika preduzeća; zaključivanje ugovora u ime preduzeća; odgovara za zakonitost rada preduzeća; obavljanje poslova iz svog djelokruga u interesu preduzeća i vođenje poslova iz svog djelokruga s pažnjom dobrog privrednika te u skladu sa etičkim kodeksom.

Pravilnikom o kancelarijskom poslovanju u JP „Komunalno Brčko“ d.o.o. Brčko distrikt BiH broj: 01-11812/15 od 30.12.2015. godine, Pravilnikom o izmjeni i dopuni Pravilnika o kancelarijskom poslovanju u JP „Komunalno Brčko“ d.o.o. Brčko distrikt BiH broj: 01-00029/17 od 31.01.2017. godine i Pravilnikom o izmjeni Pravilnika o kancelarijskom poslovanju u JP „Komunalno Brčko“ d.o.o. Brčko distrikt BiH broj: 01-00471/17 od 14.03.2017. godine propisano je da direktor zadužuje rad iz oblasti kancelarijskog i arhivskog poslovanja te da sve definiše posebnim odlukama (definisanje predmeta i akata, obrada, putni nalozi, klasifikacione oznake, signiranje pošte itd).

Članom 4. Odluke o upravljanju i održavanju facebook stranice u JP „Komunalno Brčko“ d.o.o. Brčko distrikt BiH broj: 02.07./1-02386/23 od 16.10.2024. godine propisano je da je obaveza administratora i editora stranice da u skladu sa rokovima definisanim u zakonskim propisima ili internim aktima Preduzeća, informiše javnost - pratioce na društvenoj mreži Facebook Page putem: servisnih informacija; obavještenja o planskim i vanrednim (interventnim) aktivnostima radnih jedinica koji utiču na korisnike usluga; vijesti i informacija

o aktualnim dešavanjima u preduzeću kroz tekst, fotografije ili snimke; najave budućih događaja i sl.

Naime, navodi iz prijave da zadržavanje cjelokupne zvanične komunikacije odnosno pošte koja pristigne u JP „Komunalno Brčko“ d.o.o. Brčko distrikt BiH, te navodi da se pošta nalazi pod isključivom kontrolom direktora preduzeća i da ovakva organizacija prijema pošte čini grubo i sistematski kršenje pozitivnih zakonski propisa te da se ovakvom praksom direktno krše odredbe Zakona koje odvajaju funkciju direktora i funkciju nadzora, odnosno Upravnog odbora i činjenicu da direktor i njegov kabinet vrše prijem, uvid i trijažu pošte koja je naslovljena na Upravni odbor i da predstavlja uzurpaciju nadležnosti nadzornog organa i da se time direktno opstruiše mogućnost Upravnog odbora da nezavisno postupa po pritužbama trećih lica na rad samog direktora, su neutemeljeni, proizvoljni, bez zakonskog uporišta i nisu predmet odredaba Zakona o sprečavanju sukoba interesa u institucijama Brčko distrikta Bosne i Hercegovine

Nadalje, Komisija analizirajući, zakonske odredbe i druge pozitivne propise te same navode iz prijave ne nalazi povredu odredaba Zakona o sprečavanju sukoba interesa, a u vezi sa članom 2. Zakona da privatni interes utiče na obavljanje javne funkcije u ovom slučaju, jer sam prijem pošte od strane odgovornog lica u navedenom preduzeću i eventualno dalje raspoređivanje pošte prema Upravnom odboru, te organizacija rada i način postupanja sa istom poštom nema vidljive elemente sukoba interesa, odnosno povredu Zakona o sprečavanju sukoba interesa.

Imajući u vidu sve naprijed navedeno, utvrđeno je da prijava nije potkrijepljena činjenicama i dokazima koji bi ukazivali na postojanje okolnosti propisanih Zakonom o sprečavanju sukoba interesa u institucijama Brčko distrikta BiH. Iz navedenog ne proizilazi postojanje privatnog interesa niti ostvarivanje koristi koja bi uticala ili mogla uticati na obavljanje javne funkcije i dovesti do sukoba interesa zbog stavljanja privatnog iznad javnog interesa u smislu odredaba navedenog Zakona. Navedene okolnosti odnose se na organizaciju rada kancelarijskog poslovanja i način postupanja odnosno procedure u okviru javnog preduzeća, što samo po sebi ne predstavlja sukob interesa u smislu važećih propisa koje u svom radu primjenjuje Komisija za odlučivanje o sukobu interesa te je detaljna kontrola ovakvih navoda vjerovatno predmet nadležnosti nekog drugog organa koji kontroliše kancelarijsko poslovanje. Slijedom navedenog, Komisija je donijela odluku kao u dispozitivu.

Pouka o pravnom lijeku:

Protiv ove Odluke nije dozvoljena žalba, ali se može pokrenuti upravni spor pred Osnovnim sudom Brčko distrikta Bosne i Hercegovine u roku od 30 dana od dana prijema ove Odluke.

Predsjednik  
Komisije za odlučivanje o sukobu interesa

---

Admira Mujić, dipl. pravnik

Dostaviti:

1. Anonimnom podnosiocu putem oglasne ploče,
2. Internet stranici Komisije,
3. Evidenciji,
4. Arhivi.